

ISSN 2831-1604



BILTEN

**ZAVODA ZA JAVNO ZDRAVSTVO
FEDERACIJE BOSNE I HERCEGOVINE**

Broj 14

Sarajevo/Mostar, 2026.



Obilježen Svjetski dan zdravlja 2026.

Mostar, 7.4.2026. godine

Zavod za javno zdravstvo Federacije BiH obilježio je Svjetski dan zdravlja, a ovogodišnja tema "Zajedno za zdravlje – Stanimo uz nauku" ističe važnost prevencije, zdravih navika i odluka utemeljenih na naučnim dokazima, a ne na dezinformacijama. Tim povodom, direktor Zavoda doc.dr. sc.prim. Siniša Skočibušić, dr.med. govorio je o aktuelnim javnozdravstvenim temama i izazovima, aktivnom razvijanju i provođenju konkretnih preventivnih programa koji imaju

dugoročni efekat na zdravlje stanovništva, jačanju imunizacijskih programa, uvođenju novih vakcina i provođenju edukacija i kampanja za stanovništvo i zdravstvene radnike. Naglasio je da je jačanje javnog zdravstva jedan od ključnih elemenata na putu Bosne i Hercegovine prema Evropskoj uniji. Kroz usklađivanje standarda, razvoj laboratorijskih kapaciteta i javnozdravstvenih politika, mi zapravo gradimo sistem koji je kompatibilan s evropskim.



U Centru za zdravo starenje Novo Sarajevo obilježen Svjetski dan zdravlja

Sarajevo, 7.4.2026. godine

Povodom obilježavanja Svjetskog dana zdravlja, u Centru za zdravo starenje Novo Sarajevo održan je prigodan skup posvećen promociji zdravlja te važnosti očuvanja funkcionalne sposobnosti i kvaliteta života u starijoj životnoj dobi. Zavod za javno zdravstvo Federacije BiH učestvovao je između ostalog sa predavanjem na temu „Efekti fizičke aktivnosti na mentalno zdravlje osoba treće životne dobi“.

Kroz druženje, razgovor i zajedničke aktivnosti ukazano je na značaj redovne fizičke aktivnosti kao važnog preduslova za očuvanje mentalnog zdravlja, pokretljivosti, samostalnosti te opšteg zdravlja starije populacije. Posebno je istaknuto da fizička aktivnost ima važnu ulogu u očuvanju kondicije, ravnoteže, snage i svakodnevne funkcionalnosti, čime doprinosi aktivnijem i kvalitetnijem starenju.



Održana konstituirajuća sjednica novog saziva Upravnog vijeća Zavoda za javno zdravstvo Federacije BiH

Sarajevo, 9.4.2026. godine

Konstituirajuća sjednica novog saziva Upravnog vijeća Zavoda za javno zdravstvo Federacije BiH održana je u prostorijama Zavoda za javno zdravstvo Federacije BiH.

Odlukom Vlade Federacije BiH (Službene novine FBiH, br: 22/26) imenovani su novi članovi Upravnog vijeća Zavoda za javno zdravstvo Federacije BiH:

- Denis Šundrić, mag. oec. – predsjednik
- Radoslav Radišić, dipl. ing. prom. i kom. – član
- mr. sc. Goran Šimić, dr. med. – član

- Slađana Šarac, dipl. ing. preh. teh. – član
- doc. dr. sc. Šeila Cilović – Lagarija, dr. stom. – član

Na prvoj sjednici novoimenovanog Upravnog vijeća Zavoda, za administrativno – tehničkog tajnika ponovo je imenovan Dario Barbarić, dipl. iur, viši stručni saradnik u Zavodu za javno zdravstvo Federacije BiH.

Novoimenovani članovi Upravnog odbora obavezali su se na preduzimanje svih aktivnosti iz svoje nadležnosti u cilju osiguranja efikasnog funkcionisanja i unaprjeđenja rada Zavoda.



Zavod za javno zdravstvo Federacije BiH predstavio usluge na Sajmu privrede 2026.

Mostar, 14.-18.4.2026. godine

Na 27. Međunarodnom sajmu privrede, koji je po broju izlagača i posjetilaca jedna od najuspješnijih sajamskih manifestacija u BiH, predstavio se i Zavod za javno zdravstvo Federacije BiH. Ove godine, sajam je okupio oko 900 izlagača iz 27 zemalja. U okviru programa, održano je niz panela i okruglih stolova posvećenih aktuelnim privrednim temama.

Sektor zdravstvene ekologije Zavoda

zainteresovanim posjetiocima približio je važnost zdravstvene ispravnosti hrane, vode i predmeta široke potrošnje (kozmetika, dječije igračke, pribor, posuđe, ambalaža, oprema koja dolazi u dodir sa hranom i vodom za piće) s aspekta hemijskih mikrobioloških i radioloških analiza, kao i analiza na parametre kvalitete i nutritivne vrijednosti proizvoda.

Zavod je učešće na Sajmu iskoristio i za promociju niza javnozdravstvenih programa.



Preventivne kontrole krvnog pritiska i šećera u krvi

Mostar, 16.4.2026. godine

U sklopu predstavljanja na 27. Međunarodnom sajmu privrede, Zavod za javno zdravstvo Federacije BiH proveo je javnozdravstvenu akciju ranog otkrivanja povišenog krvnog pritiska i šećerne bolesti.

U okviru ove aktivnosti, građanima je bilo omogućeno besplatno mjerenje krvnog pritiska i nivoa šećera u krvi, uz stručne savjete

zdravstvenih radnika.

Cilj akcije bio je podizanje svijesti o važnosti prevencije i ranog otkrivanja hroničnih nezazdravljivih bolesti koje često imaju neprimjetan početak, ali mogu dovesti do ozbiljnih zdravstvenih komplikacija, ukoliko se ne prepoznaju i ne liječe na vrijeme.



Predstavnici Zavoda za javno zdravstvo Federacije BiH u studijskom posjetu Hrvatskom Zavodu za javno zdravstvo i Kancelariji UNICEF-a za Republiku Hrvatsku

Zagreb, 20.-22.4.2026. godine

Predstavnici Zavoda za javno zdravstvo Federacije BiH, Instituta za javno zdravstvo Republike Srpske i UNICEF-a BiH boravili su u studijskoj posjeti posvećenoj jačanju kapaciteta u području prehrane. Domaćini ovog susreta bili su Hrvatski zavod za javno zdravstvo (HZJZ) i Kancelarija UNICEF-a za Republiku Hrvatsku koji su kroz intenzivan program kolegama iz BiH predstavili iskustva u primjeni visokih standarda prehrane dojenčadi, predškolske i

školske djece.

Glavni fokus posjete bio je profesionalni razvoj i podrška stručnom usavršavanju zaposlenika u javnom zdravstvu. Kroz direktan uvid u praksu Republike Hrvatske, stručnjaci iz Bosne i Hercegovine dobili su priliku razmijeniti znanja o unaprjeđenju prehrane kroz cijeli životni ciklus, s posebnim naglaskom na zaštitu djece i prevenciju malnutricije (pothranjenosti i pretilosti) putem sistema primarne

zdravstvene zaštite. Osim razmjene stručnih znanja, posjeta je poslužila i za jačanje strateške saradnje između kancelarije UNICEF-a

i vodećih javnozdravstvenih institucija dvije države na zajedničkim istraživačkim i preventivnim programima.



■ Učešće stručnjaka Zavoda za javno zdravstvo FBiH na 10. PhDSS

Zagreb, 24.-25.4.2026. godine

Na Fizičkom odsjeku Prirodoslovno-matematičkog fakulteta u Zagrebu, održan je jubilarni 10. Simpozij studenata doktorskih studija (PhDSS). Ovaj naučni skup, koji se održao pod pokroviteljstvom Predsjednika Republike Hrvatske, okupio je 164 učesnika iz šest država: Brazila, Ujedinjenog Kraljevstva, Češke, Srbije, Hrvatske te Bosne i Hercegovine.

Ukupno 108 doktoranada predstavilo je svoje istraživačke radove kroz 49 usmenih izlaganja i 59 posterskih prezentacija.

Predstavници Službe za zaštitu od zračenja prezentovali su svoj rad međunarodnoj akademskoj zajednici. Rad pod naslovom "Assessment of uranium and radium and associated ingestion dose in selected bottled waters from Bosnia and Herzegovina" predstavljen je u formi posterske prezentacije, popraćen kratkim usmenim izlaganjem pred stručnim žirijem. Izlaganje je potaknulo konstruktivnu diskusiju, čime je još jednom potvrđen visok nivo istraživanja koja se provode u Zavodu.



Studentima medicine SSST-a održano predavanje o značaju imunizacije

Sarajevo, 27.4.2026. godine

U okviru obilježavanja Evropske/Svjetske sedmice imunizacije, u Zavodu za javno zdravstvo Federacije BiH održano je predavanje za studente medicine Univerziteta Sarajevo School of Science and Technology (SSST) o značaju imunizacije i implementaciji programa imunizacije u Federaciji BiH.

Predavanje koje je održao prof. dr. sc. prim. Sanjin Musa, dr. med. - voditelj Službe

za epidemiologiju zaraznih bolesti Zavoda za javno zdravstvo Federacije BiH je imalo za cilj unaprjeđenje znanja budućih zdravstvenih radnika o važnosti imunizacije kao jedne od najefikasnijih mjera prevencije zaraznih bolesti. Studenti su upoznati sa osnovnim principima imunizacije, kao i s načinom organizacije i provođenja redovnog programa imunizacije u Federaciji BiH.



Održan Okrugli stol “Za sve generacije, vakcine djeluju”


Sarajevo, 28.4.2026. godine

Povodom obilježavanja Svjetske i Evropske sedmice imunizacije, Zavod za javno zdravstvo Federacije BiH, u partnerstvu sa UNICEF BiH, organizovao je okrugli stol “Za sve generacije, vakcine djeluju”, na kojem su učestvovali zdravstveni profesionalci, donosioci odluka, predstavnici institucija i organizacija koji su razmatrali aktuelnu situaciju u provođenju Programa imunizacije u Federaciji BiH.

Tom prilikom predstavljeno je sveobuhvatno istraživanje „Mapiranje dostupnosti zdravstvenih resursa i usluga povezanih s

imunizacijom u domovima zdravlja u Federaciji Bosne i Hercegovine, 2025.“, zatim „Izveštaj o obuhvatu imunizacijom u Federaciji BiH za 2025. godinu“, kao i kurikulum radionice „Kontinuirana edukacija za zdravstvene radnike uključene u imunizaciju“, koji će Zavod realizovati u narednom periodu.

Učesnici Okruglog stola su svojim iskustvom i prijedlozima doprinijeli raspravi o jačanju programa imunizacije i podizanju svijesti o ulozi imunizacije u sprječavanju bolesti i zaštiti zdravlja.





Odbor za zdravstvo Zastupničkog doma Parlamenta FBiH u radnoj posjeti Zavodu za javno zdravstvo FBiH

Sarajevo, 6.5.2026. godine

Članovi Odbora za zdravstvo Zastupničkog doma Parlamenta Federacije BiH posjetili su organizacijsku jedinicu Zavoda za javno zdravstvo Federacije BiH u Sarajevu. Cilj radnog sastanka bio je upoznavanje s aktivnostima Zavoda, razvojnim planovima i izazovima u području javnog zdravstva u Federaciji BiH.

Tokom posjete, članovi Odbora održali su radni sastanak sa direktorom Zavoda, doc. dr.sc.prim. Sinišom Skočibušićem, dr.med. i njegovim saradnicima. Direktor Skočibušić

predstavio je misiju Zavoda kao vodeće javnozdravstvene i nastavne ustanove, istaknuo dosadašnja postignuća, ali i planove i strateške prioritete Zavoda u budućem periodu. Podsjetio je kako Zavod djeluje jedinstveno na cijelom području Federacije BiH kroz svoje organizacijske jedinice u Mostaru i Sarajevu provodeći nadzor, istraživanje, edukaciju, promociju zdravlja i prevenciju bolesti, u koordinaciji sa mrežom zdravstvenih ustanova u Federaciji BiH.



JU Obdanište Travnik steklo certifikat „Odgojno-obrazovna ustanova – prijatelj zdrave ishrane“

Travnik, 7.5.2026. godine

Predstavnice Zavoda za javno zdravstvo Federacije BiH posjetili su JU Obdanište Travnik povodom dodjele certifikata „Odgojno-obrazovna ustanova – prijatelj zdrave ishrane“, koji se dodjeljuje ustanovama koje ispunjavaju kriterije u oblasti unaprjeđenja ishrane djece, stvaranja podržavajućeg okruženja i razvoja zdravih životnih navika u odgojno-obrazovnim ustanovama.

Posjeta je realizovana u okviru Programa „Zdravo jedi, zdravo rasti“, čiji je cilj unaprjeđenje ishrane dojenčadi, predškolske i školske djece u Federaciji BiH, kao i poboljšanje stanja njihove uhranjenosti, rasta i razvoja. Zavod za javno zdravstvo Federacije BiH u ovom programu ima ulogu koordinirajuće stručno-tehničke institucije na nivou Federacije BiH za pitanja ishrane dojenčadi i djece.





Učešće ZZJZFBiH u obilježavanju Svjetskog dana Crvenog krsta/križa

Sarajevo, 12.5.2026. godine

Povodom Svjetskog dana Crvenog krsta/križa i Crvenog polumjeseca, danas je u sjedištu Društva Crvenog krsta/križa BiH upriličeno svečano obilježavanje ovog dana, uz prisustvo domaćih i međunarodnih partnera, prijatelja i saradnika.

Kroz pokaznu vježbu prve pomoći i obraćanja zvanica istaknuti su značaj humanosti, solidarnosti i volonterizma, kao i svakodnevni doprinos hiljada volontera i uposlenika

Crvenog krsta/križa širom BiH.

Skupu su prisustvovala i predstavnice Zavoda za javno zdravstvo Federacije BiH, koji već niz godina kontinuirano sarađuje sa Crvenim krstom/ križom FBiH, provodi zajedničke javnozdravstvene kampanje, obilježava važne datume iz oblasti zdravstva te obavlja edukacije stanovništva o prevenciji bolesti i unaprjeđenju zdravlja.



.....



.....

Udruženi u prevenciji: Ginekolozi podržavaju imunizaciju protiv HPV-a u Federaciji BiH

Federacija BiH, 12.5. 2026. godine

Zavod za javno zdravstvo Federacije BiH nastavio je kampanju “Mali korak za veliku sigurnost” u cilju prevencije i što veće procijepljenosti protiv humanog papiloma virusa (HPV), ključnog uzročnika karcinoma grlića materice.

Stručnjaci koji se svakodnevno susreću s posljedicama HPV infekcija naglašavaju da preventivno djelovanje nema alternativu. Dr. Admir Rama, specijalista ginekologije i akušerstva, upozorio je na direktnu vezu između virusa i problema s neplodnošću.

Istakao je da, iako su redovni pregledi

poput PAPA testa decenijama osnova ginekološke prakse, imunizacija protiv HPV-a je iskorak koji nas dodatno približava evropskim i svjetskim standardima zdravstvene zaštite.

Dr. Aldina Mešić, specijalista ginekologije i akušerstva naglašava važnost kontinuirane edukacije o imunizaciji protiv HPV-a te ističe kako je potrebno više raditi na edukaciji učenika, roditelja i zdravstvenih radnika. Što se tiče prevencije, smatra da je najveća odgovornost na primarnoj zdravstvenoj zaštiti, ali i ginekolozima koji rade u privatnoj praksi.



Obilježen Svjetski dan hipertenzije 2026.

Sarajevo, 16.5.2026. godine

Svjetski dan hipertenzije bio je povod za još jednu aktivnost podizanja svijesti o važnosti kontrole krvnog pritiska te je u tržnom centru SCC u Sarajevu Zavod za javno zdravstvo Federacije BiH upriličio još jedan događaj za širu javnost.

Predstavnice Službe za promociju zdravlja Zavoda za javno zdravstvo Federacije BiH su

za posjetioce centra organizovale mjerenje krvnog pritiska, visine i težine i određivanje stanja uhranjenosti.

Mjerenja su, pored savjeta ljekara i zdravstvenog osoblja, bila popraćena podjelom promotivnih materijala vezanih za kontrolu krvnog pritiska, fizičku aktivnost, kao i drugih tematski vezanih promotivnih materijala.





Obilježena Evropska sedmica testiranja: Besplatno i povjerljivo testiranje za studente

Mostar, 20.5.2026. godine

U sklopu obilježavanja Evropske sedmice testiranja - od 18. do 25. maja, Zavod za javno zdravstvo Federacije BiH organizovao je javnozdravstvenu aktivnost na kojoj su studenti imali mogućnost anonimnog, besplatnog i povjerljivog savjetovanja i testiranja na HIV te virusne hepatitise B i C, s ciljem podizanja svijesti o infekciji virusom humane imunodeficiencije (HIV), virusnim hepatitisima te drugim spolno prenosivim infekcija-

ma, uključujući infekcije uzrokovane humanim papiloma virusom (HPV), gonoreju, hlamidijsku infekciju i sifilis, koje su i dalje često povezane sa stigmom i diskriminacijom.

Tokom provođenja javnozdravstvene aktivnosti na Kampusu Sveučilišta u Mostaru studentima su podijeljeni informativno-edukativni leci o važnosti testiranja, informisanja i očuvanja spolnog i opšteg zdravlja.



Održan sastanak WHO o budućnosti digitalnog zdravstva

Kopenhagen, 20.5.2026. godine

Voditeljica Službe za biostatistiku i informatiku Zavoda za javno zdravstvo Federacije BiH doc.dr. Šeila Cilović-Lagarija i predsjedavajuća Radne grupe za digitalizaciju i inovacije (Working Group on Digitalization and Innovation) u okviru HIN mreže, prisustvovala je 6. sastanku Evropske mreže za zdravstvene informacije (HIN), koji je okupio 41 učesnika iz 31 zemlje. Skup organizovan u koordinaciji Regionalne kancelarije Svjetske zdravstvene organizaci-

je za Evropu (WHO Europe), fokusiran je na jačanje zdravstvenih informacionih sistema, unaprjeđenje upravljanja podacima i digitalna rješenja u zdravstvu.

Tokom sastanka poseban fokus bio je na pregledu dosadašnjih aktivnosti HIN mreže WHO Europe i Evropske komisije, jačanju saradnje među državama članicama, kao i definisanju prioriteta za implementaciju aktivnosti podržanih kroz EU Health and Food Safety program.



Održan stručni skup o nadzoru nad respiratornim virusima i imunizaciji odraslih

Sarajevo, 21.-22.5.2026. godine

Stručni skup pod nazivom „Nadzor nad respiratornim virusima (ILI/SARI sentinel nadzor) i imunizacija odraslih osoba u Federaciji Bosne i Hercegovine“, okupio je predstavnike Službe za epidemiologiju zaraznih bolesti Zavoda za javno zdravstvo Federacije BiH, kantonalnih zavoda za javno zdravstvo, kao i stručnjake iz oblasti kliničke mikrobiologije.

Cilj sastanka bio je jačanje saradnje i kapaciteta zdravstvenih radnika uključenih u nadzor


nad respiratornim virusima i provođenje imunizacije odraslih osoba. Razmjena stručnih znanja i iskustva i razmatranje unaprjeđenja postojećeg sistema nadzora te povećanje obuhvata imunizacijom bile su glavne teme skupa. Poseban fokus je na jačanju koordinacije između relevantnih zdravstvenih institucija i priprema za narednu sezonu, kao i predstavljanju nacrtu Okvirnog plana za unaprjeđenje prevencije i kontrole gripe u Federaciji BiH.



.....



.....



Direktor Zavoda za javno zdravstvo Federacije BiH sudjelovao na treningu iz praktičnih tehnika kineske medicine

Kina, 20.5.-2.6.2026. godine

Direktor Zavoda za javno zdravstvo Federacije BiH doc.dr.sc.prim. Siniša Skočibušić, dr.med. učestvovao je na Treningu iz praktičnih tehni-


ka kineske medicine. Program je organizovala Kineska akademija kineskih medicinskih nauka kao vodeća kineska institucija u području

istraživanja, edukacije i primjene kineske medicine, uz podršku Ministarstva trgovine Narodne Republike Kine.

Grupa zdravstvenih profesionalaca iz Bosne i Hercegovine putovala je u Narodnu Republiku Kinu na poziv Veleposlanstva Narodne Republike Kine u Bosni i Hercegovini, zahvaljujući koordinaciji Ministarstva civilnih poslova BiH. Trening je okupio 24 zdravstvena profesionalca iz Bosne i Hercegovine s ciljem upoznavanja s teorijskim osnovama, praktičnim

tehnikama i organizacijskim modelima kineske medicine, posebno u području prevencije bolesti, očuvanja zdravlja, rehabilitacije i podrške zdravstvenoj njezi.

Učešće direktora Zavoda na ovom programu predstavlja nastavak aktivnosti Zavoda usmjerenih prema jačanju međunarodne saradnje, razmjeni stručnih iskustava i praćenju različitih pristupa u očuvanju i unaprjeđenju zdravlja stanovništva.





Učešće predstavnika Zavoda za javno zdravstvo Federacije BiH na Drugoj naučnoj konferenciji sa međunarodnim učešćem “Next Gen Health 2026” – “Zdrava djeca najvažnija reprezentacija društva”

Zenica, 10.6.2026. godine

U organizaciji Instituta za zdravlje i sigurnost hrane Zenica, Ministarstva zdravstva Zeničko-dobojskog kantona, Ministarstva za obrazovanje, nauku, kulturu i sport ZDK, uz partnersku podršku UNICEF-a, održana je Druga naučna konferencija sa međunarodnim učešćem “Next Gen Health 2026”, pod sloganom “Zdrava djeca – najvažnija reprezentacija društva”. Cilj konferencije je bio razmotriti zajedničke strategije i “Lige prevencije” za

zdraviju budućnost novih generacija. Skup je okupio predstavnike zdravstvenog i obrazovnog sektora, domaće i međunarodne stručnjake, predstavnike institucija, akademske zajednice i organizacija koje se bave zdravljem, razvojem i zaštitom djece i mladih. U ime Zavoda za javno zdravstvo Federacije BiH, skupu je prisustvovala prim. dr. sc. Aida Filipović Hadžiommeragić, dr. med. – u ulozi paneliste.



Učešće Zavoda za javno zdravstvo Federacije BiH na 1. regionalnoj konferenciji “PREVREG – Izgradnja temelja preventivne nauke u regiji”

Zagreb, 10.-11.6.2026. godine

Prva regionalna konferencija “PREVREG – Izgradnja temelja preventivne znanosti u regiji” u organizaciji Edukacijsko-rehabilitacijskog fakulteta Sveučilišta u Zagrebu, Hrvatskog zavoda za javno zdravstvo i Stručnog centra za prevenciju ovisnosti iz Sarajeva, uz pokroviteljstvo i institucionalnu podršku Agencije za droge Europske unije, organizovana je s ciljem aktivnog stvaranja naučno utemeljene

prevencije problema u ponašanju i promocije mentalnog zdravlja u regiji.

Na konferenciji je učestvovalo preko 120 učesnika iz zemalja u regiji, prvenstveno iz reda naučnika istraživača, stručnjaka u području prevencije i javnog zdravstva, donosioca politika, nastavnog osoblja i praktičara zainteresovanih za razvoj i primjenu naučno utemeljenih preventivnih intervencija.



Imunizacija protiv HPV-a i odgovorno ponašanje ključni su za očuvanje zdravlja

Mostar, 12.6.2026. godine

U organizaciji Medicinskog fakulteta Sveučilišta u Mostaru, Sveučilišne kliničke bolnice (SKB) Mostar i Udruge dermatovenerologa Hercegovine održan je stručni simpozij „Savremeni pristup dijagnostici i liječenju spolno prenosivih bolesti – multidisciplinarni izazovi“.

U amfiteatru Medicinskog fakulteta okupili su se vodeći stručnjaci iz područja dermatovenerologije, ginekologije, infektologije i porodične medicine, s jasnim ciljem – predstaviti najnovije smjernice u prevenciji i liječenju spolno prenosivih bolesti koje su u porastu

široj Evropi i svijetu.

Direktor Zavoda za javno zdravstvo Federacije BiH doc. dr. sc. prim. Siniša Skočibušić, dr. med. na simpoziju je govorio o važnosti imunizacije protiv HPV-a (Humanog papiloma virusa). Podsjetio je da se Program imunizacije protiv HPV-a u Federaciji BiH provodi kao preporučena i besplatna vakcinacija, s jasnim fokusom na dugoročnu prevenciju karcinoma grlića materice i drugih bolesti uzrokovanih ovim virusom.



Nakon 30.000 pregledane djece: Počinje peti ciklus programa „Pregledaj – progledaj“

Federacija BiH, 2026. godina

Zavod za javno zdravstvo Federacije BiH provodi pripremne aktivnosti na provođenju petog ciklusa preventivnog Programa „Pregledaj – progledaj“, kojim će biti obuhvaćena djeca rođena 2022. godine. Kao i do sada, u ovom ciklusu Programa, skrining aktivnosti će se provoditi u predškolskim ustanovama i pedijatrijskim službama domova zdravlja.

U okviru pripremnih aktivnosti, tokom

mjeseca maja i juna ove godine provedeno je pet Edukativnih radionica za učesnike u navedenom Programu.

Radionice su održane u Kantonalnoj bolnici „Dr. Irfan Ljubijankić“ u Bihaću, Kantonalnoj bolnici Zenica, JU Dom zdravlja „Dr. Mustafa Šehović“ Tuzla te u organizacijskim jedinicama Zavoda za javno zdravstvo Federacije BiH u Mostaru i Sarajevu.



Sinergija institucija u BiH za zdraviju ishranu i sretnije djetinjstvo

Banja Luka, 19.6.2026. godine

Predstavnici Zavoda za javno zdravstvo Federacije BiH učestvovali su na završnoj konferenciji povodom uspješnog okončanja sedme faze programa „Školske i predškolske ustanove prijatelji pravilne ishrane – PUPPI“. Konferenciju je organizovao JZU Institut za javno zdravstvo Republike Srpske u saradnji sa Ministarstvom zdravlja i socijalne zaštite RS, Ministarstvom prosvjete i kulture RS, uz ključnu podršku UNICEF-a u Bosni i Hercegovini. Glavni cilj programa bio je unaprjeđenje zdravlja djece kroz promociju zdravih životnih stilova s posebnim fokusom na pravilnu ishranu i fizičku aktivnost.

Poseban akcenat tokom konferencije stavljen je na međuentitetsku saradnju i razmjenu stručnih iskustava sa Zavodom za javno zdravstvo Federacije BiH. Ova saradnja ključna je za harmonizaciju standarda i normativa u oblasti ishrane dojenčadi, predškolske i školske djece na nivou cijele Bosne i Hercegovine.

Predstavnici Zavoda za javno zdravstvo Federacije BiH na čelu s direktorom doc.dr.sc. prim. Sinišom Skočibušićem, dr.med. podijelili su uspjehe i metodologiju Programa „Zdravo jedi, zdravo rasti“, čija je sedma faza u Federaciji BiH također završena.



Svjetski dan borbe protiv zloupotrebe i krijumčarenja droga

26.6.2026.



ZAVOD ZA JAVNO ZDRAVSTVO FBiH
INSTITUTE FOR PUBLIC HEALTH FBiH



Održan stručni skup i redovni Koordinacijski sastanak zavoda za javno zdravstvo u Federaciji BiH

Neum, 29.6.-1.7.2026. godine

U organizaciji Zavoda za javno zdravstvo Federacije BiH i uz ključnu podršku UNICEF-a BiH, održan je trodnevni stručni skup posvećen jačanju programa imunizacije u Federaciji BiH.

Događaj je okupio vodeće zdravstvene stručnjake, epidemiologe i direktore kantonalnih zavoda za javno zdravstvo s ciljem analize trenutnog stanja, razmjene iskustava i definisanja strateških koraka za unaprjeđenje imunizacije.

Na skupu je predstavljena analiza obuhvata imunizacijom za 2025. godinu, kao i

mapiranje dostupnosti i spremnosti usluga imunizacije u domovima zdravlja. Predstavljene su i specifične analize obuhvata imunizacijom djece i mladih po kantonima. Održane su panel diskusije usmjerene na sistemski rješenje a posebna pažnja posvećena je prezentaciji procedura za unaprjeđenje upravljanja imunizacijom i medicinskim otpadom.

Na kraju stručnog skupa održan je i redovni Koordinacijski sastanak zavoda za javno zdravstvo u Federaciji BiH.



Glavni i odgovorni urednik
doc. dr. sc. prim. Siniša Skočibušić, dr. med.

Zamjenica glavnog i odgovornog urednika
Elvedina Žiga, dr. med.

Lektorisala
Maja Kojović

Dizajn
FRAM-ZIRAL d.o.o., Mostar

Izdavač
Zavod za javno zdravstvo
Federacije Bosne i Hercegovine

ISSN
2831-1604

Mjesto i godina izdavanja
Sarajevo/Mostar, 2026.

ZAVOD ZA JAVNO ZDRAVSTVO FEDERACIJEa BOSNE I HERCEGOVINE

Organizacijska jedinica u Mostaru

📍 Vukovarska 46
☎ +387 36 382 101
✉ kabinet.mo@zzjzfbih.ba

Organizacijska jedinica u Sarajevu

📍 Maršala Tita 9
☎ +387 33 564 601
✉ kabinet.sa@zzjzfbih.ba

